

ALAHADY FAHA 24 MANDAVANTAONA - A



IZAY MAMELA NO HAVELA

Ry Kristianina havana, araky ny averimberintsika fa indrindra taorian'ny pantekôty ary amin'izao mandavantaona izao dia entanin'ny Fanahy Masina isika ka zary Kristy velona, Kristy mpiara-belona amin'olona ka isaky ny Alahady raha nahatsikaritra tsara isika dia misy toetra anankiray ao amin'i Kristy asongadina araka ny lohahevitra atolotry ny Eglizy hodinihintsika na koa toetra antitranterin'i Kristy ka hahatonga antsika ho mpianany tokoa sy hahatonga antsika ho mpiara-belona amin'olona eo amin'ny fiainantsika anivon'izao tontolo izao na dia tsy anisan'izao tontolo izao aza. Amin'izao Alahady mandavantaona faha 24 izao dia toetra anankiray izay azo lazaina fa takin'i Kristy ho an'ny mpianany satria tsy hoe nampianarin'i Kristy fotsiny fa niainany ary azo lazaina fa toetra hahafahantsika mampijoro, manorina ny Eglizy olona satria izany no tanjona ho antsika eo anivon'izao tontolo izao ho fanitarana ny fanjakan'Andriamanitra. Ny fanitarana ny fanjakan'andriamanitra dia fanorenana Eglizy olona mifototra amin'ny fianakaviana Eglizy kely ka io no manorina ny eglizy fiombonana izay zary Eglizy fototra ka zary lasa Eglizy iraka ary mitondra ny Vaovao Mahafaly eran'izao tontolo izao.

Ny toetra asongadina amin'izao Alahady faha 24 mandavantaona izao sy ivelomantsika ny

fanirahana taorian'ny JMJ izay nanirahana antsika rehetra fa indrindra ny tanora ho mpandova ny tany tranobe iombonantsika ity, ka zary ho taranaka mpanorina isika fa tsy ho taranaka mpandrava dia tsy inona fa isika mahay mifamela heloka; Tanteraka izany ry Kristianina havana raha ny hafatr'i Jesoa tamin'i Piera no tanterahintsika ;

Vakiteny I : Sir. (Ekl.) 27, 30 - 28, 7
Tononkira : Salamo 102
Vakiteny II : Rôm, 14, 7-9
Evanjely : Mt. 18, 21-35

"Nanatona an'i Jesoa i Piera nanao hoe: Tompoko, raha diso impiry amiko moa ny namako no tokony hamela azy aho? Hatramin'ny impito va? Dia hoy i Jesoa taminy: Izaho tsy milaza aminao hoe hatramin'ny impito, fa hatramin'ny impitopolo fito."

Ny fifamelan-keloka dia tsy impito fotsiny fa tsy misy fetra, izany ny fitiavan'Andriamanitra, izany i Kristy izay mamela antsika isanandro mpanota isika nefa avelany heloka mandrakariva raha miaiky

heloka. Ny fanoharana nataon'i Jesoa izay mampibari-bary tokoa ny toetrantsika andavanandro, io no toetra mahatonga antsika ho taranaka mpanapotika, mpandrava, mamono satria na dia voavela heloka aza isika dia tsy mahay mamela tahaka ny voalaza ao amin'ny Evanjely anio : *Ary noho izy tsy nanan-kalao, dia nasain'ny tompony namidy izy sy ny vadiny aman-janany, mbamin'ny fananany rehetra, mba hanefana ny trosa. Dia niankohoka ilay mpanompo, ka nifona taminy nanao hoe: "Mba omeo andro aho, dia haloako daholo ny anao rehetra."* Nangoraka ny fon'ilay tompon'izany mpanompo izany, ka sady nandefa azy handeha no namoy ny trosa taminy. Fa raha vao nivoaka ilay mpanompo, dia tojo ity mpanompo namany anankiray izay ananany denie zato; noraisiny tamin'ny tendany ilay io ka nokendainy nataony hoe: *"Aloavy ny trosako any aminao!"* Niankohoka ilay namany, dia nifona taminy nanao hoe: *"Mba omeo andro aho, dia haloako ny anao rehetra."* Nefa tsy nety izy, fa lasa nampanao azy an-tranomaizina, ambara-pandoany ny trosa. Nalahelo loatra ny mpanompo sasany nony nahita izany, ka lasa nilaza izany rehetra izany tamin'ny tompony. Dia nampanalain'ny tompony izy ka nilazany hoe: *"Ry mpanompo ratsy fanahy, efa nafaiko avokoa ny trosako rehetra aminao, noho ianao nifona tamiko; ka moa tsy tokony hamindra fo amin'ny namanao va ianao tahaka ny namindrako fo aminao?"* Dia tezitra ny tompony, ka natolony ny mpampijaly izy, ambarapandoany ny trosa rehetra.

Izany no toetrantsika, ny valifaty, ny lolom-po, io no manimba ny fifandraisantsika na eo anivon'ny fianakaviana, na eo anivon'ny mpivady, ny lolom-po sy ny valifaty no mameno ny fontsika ka amin'izao àry araky ny fananaran'i Jesoa tamin'i Piera dia aoka isika mba hahay mifamela heloka ao anatin'ny fifanajana sy fifampitokisana ary fahamarinana.

Ny mahatonga ny fontsika lo dia manjaka loatra ny lainga sy ny fitapitaka ka lasa tahaka ny henontsika tamin'ny Evanjely ilay mpanompo ratsy fanahy, ny fontsika no maha ratsy fanahy antsika. Izany indrindra no hafatra tamin'ny fotoana JMJ sambatra ny malemy fanahy fa izy no handova ny tany

Raha tiantsika hilamina sy hirindra ny fiainantsika andavanandro miainga amin'ny fianakaviana ka mandeha eo amin'ny fiaraha-monintsika dia aoka ajorontsika ny tontolon'ny fahamarinana, aoka ho tontolon'ny fifamelan-keloka, aoka ho tontolon'ny fahaizana mifanaja ka ho tanteraka ny nofinofintsika izay averimberina amintsika matetika dia ny fampihavanana raha mibebaka ao anatin'ny fahamarinana isika ka mifamela heloka tokoa dia miova ny fontsika.

Ambaran'i Jesoa amin'ny fiainany fa io no làlana ankanesantsika amin'ny tena fampijoroana ny fiainantsika feno fiadanana. Mitaky fanetrentena sy fahatsorana izany halemam-panahy,

Ry Kristianina havana amin'izao fiezahantsika mba ho Kristy mpiara-belona amin'olona ka hitondra ny fahazavan'i Kristy ka hahafahantsika hampitatra ny fanjakan'Andriamanitra, aoka isika ry Kristianina havana entanin'izay fahasovan'Andriamanitra izay hahay hifamela heloka araky ny voalazan'i Md Paoly ao amin'ny vakiteny faharoa izay mananatra antsika tokoa mba hanana ny toe-panahy feno fahamarinana, hampijoro antsika eo amin'ny fiainantsika andavanandro fa i Kristy no lalam-pamonjena ho antsika ka hahatonga an'ireo manodidina antsika kokoa hahalala fa i Kristy no làlana sy fahamarinana ary fiainana. Raha velona antsika aoka ho velona ho an'i Kristy, raha maty dia ao amin'i Kristy izay midika ny fialana amin'ny lolom-po, fialana amin'ny valifaty fa ny toetran'i Kristy

izay namela ireo namono azy teo amin'ny hazo fijaliana, tsy iza fa isika ihany no namono azy amin'ny fahotana

Ry Jesoa Kristy ô, ianao tokoa tsy manao kobaka am-bava ary izay ampianarinao dia ainanao koa ampianaro izahay araka ny hafatrao tamin'i Piera io, izay nanontany hoe : ahoana ny momba ny famelan-keloka, nolazainao fa tsy misy fetra ny famelan-keloka ary amin'ny alalan'izay ihany no hahafahana manorina fiaraha-monina vaovao anjakan'ny rariny sy ny fifankatiavana ao anatin'ny fihavanana marina ka enga anie ho tanteraka aminay tokoa izany. Amen